

四庫全書

集部

欽定四庫全書

鶴山集卷九十二

宋 魏了翁 撰

挽詩

任宜人

家聲開九戟庭樹秀三株
閭閻開金燧林風瑩玉壺
未經親絳幔何遽作黃壚
凝睇兩竿竹醇情一束芻

李大監

四海李南紀蚤從山斗韓
恥擔兵部米寧著大夫冠人

舐黃金筆天頒白玉棺平生一厚字千古薄夫寬

嘉興張寺丞

壯氣凜橫秋如何老作州有兒官左城無地辦菟裘木
落湖陰暝書沉塞外秋佳城千古恨樹靜晚風遒

韓主簿

當年門列三株樹馬足駸駸桐木韓誰謂平生螢雪事
姓名盤古榜中看

不趨益守杜國輔醉伴隣翁王慶源一代風流蓋棺了

空餘翁仲慘青原

馮校書

高志崢嶸局九州直從人表著仙籌青囊書在鬼神泣
黃絹辭高水雪羞槐里但知矜折角蘭臺無復問長頭
玉棺夜入青雲去山是人非白鶴愁

丹稜楊子金

諱城其子
經字正父

氣象古君子

行狀語

淵源朝大夫里門車下澤客舍馬青

芻霜栢寒逾勁庭荆老不枯只愁兒返哺不及見飛烏

子經為
飛鳥簿

楊經母范氏

大父生逢世嚴君死守城尊璋全節義娣似得賢名夫
子行無玷男兒學有成典刑今已矣風雨送紅旌

于眉州貞

士為謀身蛇有足人於器訟鼠無牙獄書一落于公手
不識從來豪大家

南浦冬陰翻手雨湓江春漲打頭風乖逢命耳吾何戚

羸得三州桃李叢

老鴈長雲橫蜀道歸鷓落日倚江城
摩娑少日生祠記
忍聽虞歌薤露聲

賜冠帔楊氏

賓筵籩秩秩宗室被祁祁
琴瑟鷄鳴御山河象服宜六
珈不借老兩髭
擔維儀一代賢公子
堂堂鎖總帷

嚴霜六月降老榦四時春
事閱三朝舊年開九袞
新母孫相與命輩行
獨斯人蹇我幽憂
久傷心倍等倫

李參政壁夫人張氏

澗谿蘋采采夙夜被祁祁琴瑟雞鳴御山河象服宜西
悲零雨日南望殷雷時彤管今猶美歸羨不及貽
銜命龍荒日危機呼吸間內言知勉正時事迄多艱誤
國頭顱去和戎使節還至今為厲梗撫事不勝潛

王寶謨勲

寧懷會稽綬不遺帝城書仕止四千石年開八袞初傾
困除旱魃防岸免民魚欲識恩田廣銜哀到小胥

瀘江蛟夜泣柳廟鶴秋飛零露傷蘭穎淒風撼玉徽
高恍兮惚精爽是邪非豈必存亡問吾知全以歸

昔我仕龜城猶能友寧馨記曾斟別酒俄遽隔泉扃
頃刻成三世淒涼隔九齡魂兮誰與作吾友許公銘

郭宣教

趨義古君子辭榮真丈夫里門車下澤子舍騎傳呼
霜栢寒逾勁庭荆老不枯典刑今已矣宰木嘆羣烏

蟠螯孫通直

趨義古君子辭榮真丈夫澤車款段馬古錦小奚奴老
樹檠蒼榦修庭擁碧梧發潛無巨筆斜月照龜趺

何府君

搏文前成都僉判應龍之父應龍赴堂察至中塗而搏文死

林泉閒富貴縑素老功夫

晚年著氏族譜

古樹檠蒼榦修庭擁

碧梧只安車下澤不侈騎傳呼軋軋成都道還家日未

晡

橐裝隨寶劍將水過荊州世事雲翻手客程風打頭空
回剡溪棹莫挽海山舟欲報何嗟及堂堂閱一丘

表參政

說友

奕奕萬夫望才名四十霜
重來陪講幄三入位文昌
地闕南廳峻塼重首折行
修途日未旰弭節復相羊

耆舊晨星似公胡不憇
留竟成青塢去莫返赤松
遊時事方歌枕天年不到
頭獨餘經在笥袞袞付公侯

生世恨不蚤庚申始識公
象衣垂綵

子內綵切

長佩

奏璫瓏幸甚蠅依驥居然
燕背鴻靈輒送無路淚灑
雲

溪風

樂府君材

縑緗迂活計，屋壁老功夫。
月暗烏聲迥，霜寒鴈影孤。
江靈知孝子，天賦厚耆儒。
賸馥多沾丐，于今道未臞。

大雅云亡久，流風尚典刑。
賦登司馬室，詩授伯魚庭。
不及瞻郎罷，猶能識寧馨。
蕪辭書琬琰，敢齒蔡邕銘。

趙廣安昱

蚤志周程學，期窺孔孟心。
人知行馬貴，我愛隙駒陰。
秋樹檠蒼榦，霜空聳翠岑。
一生迂事業，造物作知音。

星隕南昌日梟鳴蜀道時
孝誠移地軸忠淚灑天涯
盡已遑他恤求仁不復疑
衛公精爽在足慰九原思
珪組曾分寄經綸未究才
冥心求己事真氣養玄胎
月遽中河落蘭先白露摧
若人嗟不淑天意謂何哉

譙修職

風高鴻影隻秋迥鷺飛雙
桐帽人耆耆綸封澤駿龐
歐書曾肆力古調罕同腔
且幸碑銘識無從親扣撞

韓少謨

早年豪氣蓋區中晚歲頽然一病翁負許才華竟何事
有皇上帝豈夢夢

據鞍新息困壺頭歎段何如弟少游馬革裹屍吾願足
不然肯向死前休

鏡裏孤鸞背影飛庭前玉樹向人稀尚思別我成都去
忍聽虞歌薤露歸

郭孺人

一性根原匪自今厥生異甚理難尋

二十有四
月而生

因思出

腹恩難稱不恤傷膚念極深雷殷饑腸旋斂蟄春溫好
語解移陰華堂命服蕃孫子天報還渠一片心

陳隱君

新息亡人過關西畏已知袖無漫滅刺門鮮在亡辭庭
下荆三樹墳前桂一枝堂堂風木恨掩淚讀邕碑

宇文瀘州二首

篤信寧違俗質行非近名室無官燭淚庖有甑塵生吏
不知廝卒家母役叟兵茲猶餘事耳徹底是真清

風壑昂修幹，霜空突翠峰。介然疑苦硬，行處獨從容。不
忝南軒嗣，奚慚北學宗。巫陽招不復，曖曖日高春。

陳總領三首

士處宴安日，咸歆節誼名。范陽徒爾怵，河朔莽然平。僅
識淺利害，惡知真重輕。開禧忠義傳，吾得扈農卿。

舉頭西日遠，滿扇北塵汙。病已關心腹，吾何愛髮膚。變
名逃越難，微服過商都。忽復天開霽，依然只故吾。

聞詔彈冠日，頽然禿鬢翁。當肩百鈞重，卷袂兩拳空。既

上供軍最方修給饗功大鈞那可問曾不慙留公

潼川孫監稅

平地九折坂通天一片心寧甘門骯髒不與俗浮沉方

授縱橫對忍聞虞殞音平都秋月白精爽伴王陰

卒於
豐都

山

廖巴州

區區白屋一生酸落落朱幡兩鬢斑篆水秋成蒼氏富
字江春暖玉人間二千石祿人常有九袞年華天所慳

手種芝蘭香滿室堂堂歸去住青山

王處士

槿籬山下屋桐帽水邊村遺子方寸地傳家廿音入二

十也

四言芳蓀生夕秀衰柳帶秋昏千古堂堂恨青雲落淚痕

史制幹晦甫

萬川元自屬公孫竟策詞場第一助理有是非寧撓奪
官無大小只憂勤紛紛白地皆灘瀨豁豁青天亡片雲

滿腹詩書竟何用
泉臺曖曖日西曛

宗慶通判楊君光

長佩高冠集翠裾
華途落落僅題輿
官無大小皆行己
理有是非寧問渠
賦似長楊猶悔作
材如椎劍獨藏餘
方相掩淚催歸去
遺藁空傳子政書

羅承事

人為浮名若挂鈎
夫君知命獨休休
寒烏落日風林晚
老鴈長雲夜壑秋
寶劍裝留松影裡
黃金籛在架籤頭

便隨丹旆堂堂去
宰木號寒起伏牛

張隆州燿

行馬門闌宰曹魏
高冠長佩獨委蛇
紫微自有申公學
太史還從從祖知
靜嘿無非蒙力處
功夫全在不欺時
故家遺俗寥寥甚
忍聽虞歌薤露悲

計處士

我之外王父早歲識
殷州落落雙蓬鬢
蕭蕭一衲表天
時四不出人事百無憂
事業雖亡試全歸
閔一丘

致政宋君

窓寒研冷一生酸
坎止流行百念寬
劍騎已荒江北草
簡編歸伴室中蘭
孰癡孰覺從渠看
真是真非只我觀
掩淚方相人已矣
廣平遺錄僅留殘

楊隆慶

夜雨撼雖渠春風載畢逋
畏途搖短夢壯志束長湖
如此奇男子終於朝大夫
鮮原千字誅賴有少公蘇

孫夫人

莊重知為女寬和解相夫母慈均衆子婦道盡皇姑春日鳴搏黍秋風撼畢逋尚遲彤管筆宿草卧龜趺

程節推

入官當是學優時政學尤知念昨非黼實剖爭真識變寶刀佩信解知幾人謀是處雖同好天理當然識者希易箒遺言無一愧死能如此庶全歸

從事郎致仕史天應

人為浮名若掛鈎夫君知命獨休休東都門外蚤辭祿

西峴山前不入州，告第書歸泉壤底。
滿巖金在架，鐵頭當年勇退稱。
三老此老胡寧不，慙留。

雅州教授杜君

侑

衣冠不但教城南，百世詩書味孔甘。
夜半辭金知畏四，璞中有玉別寧三。
宦情本與秋俱薄，旅夢每驚春未酣。
已矣參軍誰喜愠，一陂綠水鎮涵涵。

成都教授史君

漸

惕乾迂事業，講授老功夫。
日暮烏聲急，山空鶴影孤。
高

譚霜皎潔及物雨昭蘇已矣公何憾于今道未曠

楊夫人

師復之妹

行應玗璜女子師薦脩蘋藻大夫妻禮門總是行持地
宦海元非愛欲泥翬翟相傳猶白鳳鷄雛可伏勝黃雞
柳州念妹嗟何及令德章章銀筆題

楊修撰

虞仲

早辭天子詔晚挂大夫車文雅三朝舊風流二祖餘眼
前甲乙石甯次丙丁書自古誰無死前休得似渠

東都方枕奠方鎮尚根盤不得裴中立誰承田季安威
稜行閩外聲績在朝端猶使江陽隸聞風亦膽寒
玉樹藥雙幹靈椿老一株林泉間富貴屋漏靜功夫靖
節自為傳耆英還有圖碑材還鎮石此墓不須諛

宇文樞密

人物眇然甚天胡不慙公北風鳴械械西火亂蓬蓬襄
鄂誰專閩江淮孰總戎是應當饋歎曩日鎮江功

夷攷公言行真成肅愍孫星樞繩懿武月殿媿隆恩契

潤成三世淒涼隔九原壯夫襟上淚併為兩師垣

唐昌文賁文

重葩殫

於切

葉露華濃不忝家聲得似公休息生靈牙

頰裏轉移事變笑譚中却將仕宦四千石換取寬閒五
百弓歲路今歸僊壽里春來原上紙錢風

通直郎史君子震

疊疊南陔意孜孜北學宗片言銷巧詆三語劇崇墉正
喜雲隨步俄驚日下春樓前半輪月依舊挂長松

劉少監靖之

端重唾浮俗深沉燭事幾上天陪將相宥地贊樞機辰
告言猶在朝回事已非空貽郎罷嘆不見子行歸
天子龍飛日東征與子同俄將滿船月換却打頭風志
尚觀其始規模識所終人才眇然甚胡不慙遺公

游監丞仲鴻

論激回天力身開夾日勛危言起平勃姦膽落伍文淚
灑衡山日神淒蜀嶺雲若微劉柱史千古閱清芬

冰至人猶玩波顏力不支搖搖路旁梗烟烟日中葵學
道長身健憂時兩鬢絲竟搖天老眼界以寧馨兒

張運判

闕

之母呂宜人

昔在傷皇辟子行猶不歸嫠居言有則喪事禮無違軻
母三遷教萊兒七十衣至今霜月夜松竹帶芳徽

錦鄉閒日月象服儼山河富貴吾無羨平反爾幾何相
依在歲晚不競得天多欲報無終極悲風振蓼莪

高承事

長身拘矮屋雅志壓華顛已矣寧非命倚其尚有傳飽
餐廣文飯不擊陸侯鮮惜也文明縣耆英欠此賢

承事嘗夢

異人謂蒲江為文明縣故云

家涪陵

聞風唐御史得意古田官治郡當如霸閒居略似潘慈
庭春後寂書幌夜深寒漫有一區宅傳家地自寬

羅監廟

春風擢擢秀階庭歲晚悠然物外身不把簪纓傷野趣

肯迂劍騎拂天真種成墳上一枝桂空老堂前百歲椿
鄉里善人今已矣龍門送客一酸辛

馬少卿

重葩掩葉露華濃不忝家聲得似公言行端和今世楷
貌心醇質古人風直將趨走二三節換取寬閒五百弓
如此名卿緣手盡同時更送竹溪翁

費參政葬于竹溪山故云

費參政

士寅

鼎鼎誰無宅人間畫錦難秋風三徑老夜雨兩峯寒有

志時看劍無心晚據鞍行藏付千載反覆要人看

黨論危疑日幾微細補縫平舟行浪穩暖氣拆冰融風
雨千間屋酸醎一鼎饗人才闕國本誰念昔培封

曲突有危慮扣閤無隱情揮戈羣喙害斷鞅一精誠斬
錯終何補征遼禍已成惟公獨知我勸主不言兵

虞萬州

剛簡

妻趙安人

二首

婦言加婦德公子嫁公孫澹泊於心慊去聲紛華入耳頻

晉秦稱匹國韓姑爛盈門乃與其夫子十年江上村

江上有何樂蕭然吾亦忘午眠春寂歷晚步水滄浪倦
去推門入快來索酒嘗清風那復見江濶莫雲長

樊仲恂母太碩人李氏

梁君遯世偕妻孟崔母祈天為婦唐身是六朝人物舊
眼看三世子孫昌人知翕翕味方雋誰識眈眈意最長
猶恨年華不滿百僅成三萬五千場

范聖門

子邦

之母孺人史氏

是中無一物快活
快活此誌中語

是中無一物快活不容言以此行州里留之遺子孫寒

泉鴻鴈影落日鳳皇原三復幽堂誌夫人不死存

江州司馬安君

煥

當年風雨脊令原共挈兗顛奏凱旋弄破峨眉山月影
慵移湓浦荻花船浮雲都似夢中覺妙句猶於身後傳
腸斷美人湘水隔憑鴻寄淚識新阡

李懷安

嘉木

鄉邑賴著龜天胡不慙遺與人交樂易處世事平夷甚
矣古常者傷哉今已而撫時傷牧守忍淚讀劉碑

張隱君才叔

觸事無非學非儒果誤身體中識天地筆底定君臣安

樂堂前月希夷枕上春

二語皆誌中事

是應家有子不止活千

人

臨邛張夫人之葬某既先事為之識窆今日月

有時而某儼在衰經義不獲往弔又不能為

文以侑虞殯命兒冲代賦

菴葉重葩兩大門只憑道義世婚姻養成氣質槐為芷

發見儀容竹有筠自是子能為國士何須女必嫁官人
世衰俗薄昏成市三復碑銘憤滿巾

黃夫人之葬某新有喪不得為文以侑虞殯命

兒冲代賦

夫人心事與天謀錢鏹功夫歲晚收秭鞠聲中春滿羽
畢逋枝裏月橫秋將雛欲上空回首食蔗才甘不到頭
况是我翁方念母兩鄉風雨一般愁

成都杜五一府君之葬某新有喪不得為文以

侑虞殯命兒冲代賦

尚記維川死今年又哭公琴聲辭夜月書葉卧春風兒
女數行淚親朋十九空我翁方念母忍淚課兒冲

吳府君

漢臣

人誇罵賊與尊君我看閑家與事兄更識為人謀質實
便知處已事分明夜窓殘夢鸞離照
吳君文妻先
二十日卒風壑
哀號烏失聲從此長寧鄉下路兩山明月一般情

史宜人

勉夫惟有義為舅可無生不是多聞識那知真重輕子
從觀處化身在吉中行况復無餘憾堂封勒蔡銘

家承事

昌時

崑火玉孚尹喬松冬夏青塵沙吹海立風月半窓醒適
意問芒屨無心待屏星風流那復見食報在寧馨

史致政

公亮

口道先王易躬行君子難浮榮殘夢覺活計一般酸日
晚烏聲急風高鴈影寒行藏付千載反覆要人看

王宜人

門譜誰誇郡姓強是家元自孝廉郎
長來但識詩書貴老去不知簪珥香
吏部生涯餅裏粟夫人宗事橐中裝
他年點檢挈蒼藁寧愧歐公誌薛楊

李德邁

嗚嚶出谷邈難親斷鴈辭行不可羣
論事期期猶在口逢人頷頷齒穿齦
乾坤許濶猶有礙風雨滿前如不聞
腸斷天津邵夫子東籬掩淚立孤雲

知重慶府致政何君

真固

外監名父子元方難弟兄鶴空黃壤夢鴈續紫霄聲山
遠玉無脛春多天有情至今溪上月猶傍碧梧明

不把英雄殼移為仕進媒邑焚羣怪吠竈婢亦驚猜且
効功成退寧湏興盡回芸芸終有謝羸得早歸來

任重慶

沂孫

諸任方袞袞惜也大任君曲突人誰信扣闥天不聞膽
隨豪滿幹齒為憤穿齟莫挽泉臺恨周簫咽澗雲

前利路運判冲佑李君 嗣文

篤謹寧違俗清淳不近名幾多歧上泣獨自吉中行歲
晚露沾草山空霜滿荆南溪後月夜的為誰明

從索心知舊樞庭肺腑親不從呼爾食寧獨曳其輪吳
子傑魁士黃公忠蓋臣所知非所厚亦足驗為人 李君平日

最為楊端明所愛與費參政至親不蒙其力乃為吳德夫黃文叔所愛

楊仲遠 蓮

屬我銘先竈元符事益光十年黃壤夢再世松崗樓

外焄蒿集

作樓望墓

閣前名節香

元符閣

吳鈞無處挂芻束寄

諸郎

程隱君

歲凶餅粟罄屋破褚衣單地寂烏烏樂天高鴻鴈寒墳
前晚生桂露下草摧蘭只把存耕處令人反覆看

通直致政姚君

溥

一生官偏仄幾處獄平反夜雨滴歸思凱風吹淚痕竟
令駒入夢莫盡柱銷冤點檢慈恩舊秋空幾斷魂

樂隱君

人畸天則偶俗隘我常優謾道螭憐鼈終成鵲避鳩蹇
驢花露曉孤鴈稻雲秋想見招魂曲人人說少游

許侍郎奕

杏園春接袂蓬省夜分燈權相不吾以貴人惟子憎雖
云殊爵位均不愧交朋顧影追前事悠然涕滿膺

近事君知否王心莫與寧融風薄台里秋雨暗前星鴻
集稻梁少虎嘯川谷腥人才闕世道歛涕為公銘

己卯
年慶

元府大火
皇太子薨

峨眉主簿樂

暉

尹心隨處驗舜樂切身看春味注胃臆秋河懸筆端胡
為鐵研敝纜脫紵袍酸天匪夢夢者吾於由也觀

高公權之母郭氏

婦道始衷終寧過三者從髣髴維我特蓬首為誰容但
識同心處寧拘異域封壇前兩溪水晝夜自溶溶

楊處士

丁年已分與時違，便把書棚囑付兒。
峨嶺秋寒千古意，符谿春暖一筒詩。
彩雲來往吾何與，草露消磨我自知。
含笑黃泉應不恨，桂華猶有未開枝。

教授致政李君

圻

冠蓋任雲浮，門前日夜流。
不為盱豫悔，肯作浚恒羞。
科第聯五葉，詩書間一丘。
芸芸終有謝，羸得早歸休。

魏撫幹

正仲

同姓又同升，知君莫我深。
磨人三寸鐵，行己四知金。
雪

柏擎蒼幹霜鐘振曉音
若人今在否撫事一沾襟

韓聖問 繪

蠟貌寧違俗規行不競時
苦思頭沒膝勤誦涕垂頤
州縣頻勸駕藩方嘗俛眉
飄零竟何益風雨脊令枝

黎州安撫趙 公庀

不為軟語混光塵獨把剛腸敵世紛
讀史功夫頭沒膝疾時風論齒穿齟
慈烏反哺終違志斷鴈辭行不作羣
猶有寧馨傳素業為求注傳賁丘墳

知廣安軍勾侯

突兀雙楠樹翹枝照戶青春風吹潏潏秋雨立亭亭蟻
夢迷符竹牛涔兀屏篁但令根本在有茁媚階庭

知合州趙侯

悃悞古循吏寬和鄉善人鸞宮六老會月墅四時春轉
眼園松老驚心宰木新來遲傷杜牧賓主總成塵

六老與山

月樓三容
今皆亡矣

家夫人

江鄉推甲乙家史自名門作配昔相友流風今尚存三
珠方秀媚雙劍忽飛騫丹旒蓮峯路悲雲落日翻

知叙州史侯

便乘龍歲去吾黨果何觀春味注眉曉秋河懸舌端仁
心隨處見民事切身看十載升堂夢堦前茁紫蘭

齊安郡向夫人

祥符名相裔元祐宰臣孫展也晉秦匹爛其韓姑門世
紛冰似冷壺範玉如溫千古峨眉月爭輝北客魂

蔡推官用同之父母與伯父母

劉左史以其兄弟合為一誌言

其不析產與事父

母愛宗族等事

人生宇宙皆同氣况此根心貫一機安用有生銜父恤
只愁無德報春輝桂芳春老傷何及樹靜風號願竟違
更恨母慈臨訣日嗟嗟季役未曾歸

馮夫人

解道先天易能哦擊壤詩只因居有習母謂女無儀在
姆師遂立從夫婦得咨暮年尤慰意玉壻作門楣

費華文

士殘

謹厚傳燕國寬和似蜀公材猷今世楷論建古人風闕
世心猶壯憂時鬢已翁芸芸今有盡歸去得全終

三鳳齊飛日相期到白頭一丘生處樂萬事死前休風
急啼烏夜霜零斷鴈秋懷人竟何極緘淚寄西州

張運判

師夔

悃悞漢循吏咨詢周使臣知心三坐主報國兩門人綵
繡方趨戶總麻已在身至今寒食路孺慕鎮如新

李郎中道傳

太息金泉守西歸空好音孳孳求友意懇懇愛君心謀
道身多阨憂時力不任懷人今永已為世一霑襟
解道公行止江東老父兄羣州垂瘵死膚使為更生民
裕身逾瘠時危命亦輕潯陽江上月猶傍諫書明

武康主簿吳詠

羯末誇羣從凝徽肖一之風花搖切夢梅雪照詩脾

風花

梅雪誌
中語

日短烏聲急天寒鴈影悲廣輪高隱地千古一

連泐

天台張氏兄弟

靜將物理驗良知父母恩深報稱微羣動芸芸看夜息
萬生點點發春輝錯居宇宙猶同氣况此根心貫一機
理道亶然人莫究是皆兄弟庶全歸

度周鄉正之母蹇太宜人

八十三年雪檜身直將簪珥當冠巾生兒須擬范孟博
論士亦知程伯醇在約能令家有塾居閒肯使食無賓

世間為母皆如此扶值三綱不乏人

夫人嘗言今大儒
惟朱文公命其子

往從
之

朱邵州

拱辰

杏園猶記賞花同忍看前旌照眼紅
仁心觸處作春風棣華韡韡天倫厚
萬事紛紛緣手盡只將孝友詔無窮

袁侍郎

學術趨平實年來似寂寥
學無先後覺未始終條此

老能深造諸公獨後彫平生寄心事髣髴見魚朝

誌中論覺

云食罷飲湯忽驗和叔之覺
魚朝者公曾作衆魚朝鯉圖

骭髀嘗三黜脂韋或萬鍾芸芸終有謝炯炯此何窮
雖穴皆鳴鳳生涯僅老龍輪囷憂世抱撫事轉冲冲

恭挽寧宗皇帝

內禪踰三甲中興會百年歸疆纔汶上勒石未燕然忽
悵龍髯墮旋瞻燕翼傳遺民滿關洛南望涕漣漣

玉冊宗昭考寧王德比純官庭天事業廟室祖精神遣

奠俄廠馬書言痛獲麟人窮天亦感雨雪故連春

吳府君 廣

篤信寧違俗徐行不競時與人交樂易處世事平夷甚
矣古常者傷哉今已而龍山春夜月長照鳳凰枝

陳寺丞 交

人物晨星似如公正獻家皂囊真相業黃卷舊生涯胡
不愁遺老而興大耋嗟天高那可問淚眼為麻查

聖主搜賢詔愚臣薦士書高崗看穴鳳靈沼蟄潛魚時

數自信屈帝心誰戚疏臧倉徒擾擾窮達不關渠
有子知乎否蒼生生命益危共傷周赫赫誰叫廟禧禧隨
處皆塘斧何方不繭絲斯人今已矣撫事轉傷悲

樊迪功

景南

白鶴招人反舊廬舊人落落曉星疎正傷邢璧埋黃壤
又嘆燕椿非老株不見登山靈運屐空懸下澤少游車
死於平世君奚憾鴻鴈磬磬未奠居

叙州弟

與汝為兄弟前年五十年並驅驂接革偕立鴈差肩此
意春融洩中年俗糾纏每期身蚤退白首對牀眠

禍我天何酷子歸自占誠女孥俄別父宗直亦辭兄家
難已稠疊寇氛方滿盈分明天有眼不照此時情

人物寂寥甚天心分付誰禦戎傷畜縮講學病支離吏
橫民重足時危命一絲若人天亦靳撫事轉傷悲

楊子禮

事業古人謀寒鐙耿夜篝正青諸老眼枉白一生頭犂

确秋難熟崦嵫日易收
可憐鴻影斷老淚滴監州

文彭州 誠之

二仲嬋媽起清修自一家
踐塗中險阻宰郡晚光華
氣燄奔金敵威稜愴鐵耶
料應九峯下朝露泣桃花

趙德安 希混

甲申露布告誅曦丙戌巴臺已磔禧
或謂祿額非漢患
誰知田李遺唐危安州得禍聞人說
荆莫上功惟我知
三十三年舊寮友朔風吹淚讀殘碑

楊叔介

尚記少年場英英兀老蒼鄂不齊挺秀蘭茁竟摧芳老
盡凌雲氣悲成捉月狂若人竒且折此事費平章

張通判

規摹都水監文采白雲卿奕葉皆華貫夫君獨屏星滋
滋熙世學藹藹擅詩聲耆老彫零盡從誰正典刑

魚耶孫氏

可堪風撼木不見雪盈簷
度緯愁春晝免書課夜深米

鹽毋我累惇獨是予心未報熊丸苦寒堂服已廩

仲女

荆江春夢斷虞殯夜魂孤未及陪宗室應難耐舅姑一
時母從子百歲婦隨夫此禮緣情制臨風老淚枯

武康軍僉判師君

換卻野人服衣之從事衫人忻犧被繡我笑馬羈銜客
靜閒尊禁身彊閣杖函典刑那復見宰封閱深嚴

楊極父

高堂元祐脚下澤少游鄉

語中

自得林泉趣不登聲利

場年方登四豆日已下三商有子翁無咎存心味更長

存心
堂名

史合州

昔忝東川使知公才諳長莫邪寧是利薤本未為彊橫
掣悲秋塞凝香送夕陽邊關正多事感慨卧龍岡

孺人譙氏

門閭冰似清譙女復蘇甥幸有室家樂寧無兄弟情滅

鄮雖未忍歸衛不容行獨殿諸昆後鸞封貴九京

李順慶 鏗

蚤紹多聞學親承太史傳才資元近厚輩行最推賢七
任二千石分符三十年大廷無一跡歸伴壑龍眠

高開國

秦叔

並游英俊半歸泉何事夫君又弱馬廉退風標留萬口
勤勞心事入塵編團團故步八千石落落浮名四十年
除却江東膚使在一時舊話向誰傳

高龍學

蜀自開禧後西垂畏廩秋更經兩單闕盡棄五邊州新
沔依同谷中梁恃武休匆匆移米嶺往往阻金牛嶓冢
略逋寇益昌隨解舟近猶趨劍閣遠或至渝涪棄守儕
民旅奔軍齒寇讐亂生寧有豸衆潰已無鳩伯也傷時
久民兮已作憂外沈隨分定行止與天謀高尚辭丹詔
低回佐碧油封疆資屏翰原隰賴咨諏事變方濡首人
情苦掉頭誓言捐一死力與障橫流固分為忠鬼安能

效泣囚訣辭貽子弟壯語駭朋儔憤極拳穿爪兵交血
染體不隨餘民滅甘逐遠巡遊志士聞風起頑夫背面
羞公身無復憾疆事更誰籌學士標龍直文階列禁遊
湛恩沾骨肉新廟賁林丘三穉雖云厚百身安足酬遊
魂如可作近事亦知不懲敗從婁敬交隣激叛侯未論
輕漢鼎長恐誤梁甌後事惟辛螫前修不慙留玉棺行
有日丹旄送無由渺渺河山隔皇皇兄弟求非惟在原
急亦為念宗周

贈

贈易數雍堯俞

宗君明受焦贛易其說長於災變分卦更直日用事以震離兌坎為方伯監司之官凡近數月遠一歲所言屢中史號呼大叫遂謂房用之尤精嗟夫易以占來天地之消長萬古之廢興且莫之逃今以能言遠一歲者為精之尤漢儒之陋可知矣考之傳况又未必能言及一歲言乘傳奏事及涌水出近一月遠數月耳逮其

不密失身乃不自鏡見京易未易疵也特其傳數而不
論理易者少之雍君頗有志於學推測休咎歷歷如見
無徒效漢儒托經傳數則幾矣

贈資中王彥正風水說

祖宗山陵自永安以後皆在嵩少之北洛水之南岡阜
演迤互為拱揖登永安縣之西坡望安昌熙三陵在平
川尤為卓絕蓋其地勢掌平凡一百十有三頃方三十
里柏林環秀萬安山來朝遙揖嵩少考其始初營卜則

安陵惟舊而昌熙以後乃以太祖生於洛陽愛其土風嘗欲都之不果末年因西幸嘆曰朕生不得居此死當葬此遂謁陵登闕臺西北向發鳴鏑中其所曰我後當葬此他日弓劍既返即其地為昌陵而後來皆因之始亦不過以鳴鏑為準蓋非有某山某水之說而至今陰陽家咸謂東南地穹西北地垂為角音所利故能久安利不利吾不得而知也而獨知夫初卜之意為不若是也爰旣南狩庶事草創隆祐之喪權卜於會稽而朝向

適又與永安諸陵相似亦協於音利有上皇山新婦尖而隆祐攢宮正宅其下吁開寶之行營蔽自上意紹興之權厝事出倉卒而山之朝向前後一體又於風水之說不相戾世蓋有本不出諸此而未嘗不出諸此者也資中王生雖本以風水名家而心目曠遠善識統體且能傳諸卦義裁之以理非史巫紛若之比余一見而竒其有識會離憂患俾營兆域主賓一語乃決不數月乃克襄事王生辭去請余言以信其說余固有感於風水

之多異說而溺言者之不知返也乃書前說以遺之以見夫王生善發山川之闕而人之得王生以發之而俾死者有所歸皆非偶然也生乎其敬之重之毋忽

贈術士楊坤

開禧二年余自館職補外普人何大圭善論太一數謂余曰子姑待之蜀且有亂余行至巴峽間而大圭之言驗迨安公以戮曦聞余始還里蜀人往往能道曦未授首時事謂眉人有楊坤者能先事言之今觀安公所題

果信前聞之不誣也天下之生久矣一治一亂蓋氣數
屈信之變使然有不容已者雖天之愛人不能使之常
治而無亂然必為之生才以擬其亂國雖靡止或聖或
否民雖靡膺或哲或謀或肅或艾是理之在世間蓋瞭
然若此而士之曠曠者往往一術士之不若甚至辱身
喪節吁其可嘆矣夫撫卷慨然書而歸諸坤

贈太素陳純

術家者流自秦漢以後盛於世者已有所謂風角遯甲

七政元氣逢占覆射挺專須臾孤虛望雲省氣等說其末益蔓則又不止是然大抵囿於陰陽之器乃若察脉以知吉凶則於人之血氣經絡往來消息之度而得之較諸他術最為切近如醫緩識二豎子猶是易事至醫和遂能以君之疾而覘知其臣若社稷况一身之近者乎陳生挾此以遊諸公間數有奇中其術不為不精矣今自遂而歸成都也索余言又書此以勉之

贈王彥正

嘉定二年余以心制里居宅兆未卜聞資中王直夫雅善青囊之術即具書幣致之居三日余表兄高南叔拉與登隈支山過蟠龍鎮歷馬鞍山未至山數里直夫頓足而言曰由長秋山而下乾岡數里其下當有坤申朝甲乙出之水子之先君子其當葬此乎下而卜之果如所云遂為今長寧阡既又為余言子未有室居子之先廬被山帶江其上有山與馬鞍之朝向若相似然隈支為巽己峯實當其前儻知之乎余曰而未嘗涉吾地而

惡乎知之曰余以氣勢之所萃知之卜之又如其所云
由是即其地成室是為今白鶴書院直夫又曰書院氣
勢之所鍾當有以文字發祥者余乃約十餘士之當赴
類省試者會文其上是歲自類元王萬里而下凡得七
人其不在得中者後亦接踵科第或以恩得官莫有遺
者又曰白鶴書院雖得江山之要然此地堙鬱已久今
一旦開豁呈露則家於是山之下者其餘氣所鍾亦當
有科級之應是歲余弟嘉甫與鄰居譙仲甫同登即七

人之選也先是貢士題名於浮屠以問直夫直夫曰若在七級則當七士後皆如其言凡此皆余一歲間身履而目擊者自餘類此者不可勝數恐歲浸久而忘之姑隨筆書此以記

贈術士孫守中

先王盛時瞽矇與瞍皆得食於樂正大師小師教之眡瞭者相之不寧惟是凡窮而無告者皆有常餼凡瘖聵廢疾者各以其器食之蓋盈宇宙間無一民不屬焉所

以共明命而厚同氣也降春秋而此意亡往往假推算之
伎以餽其口而聽其自為養上之人不及知也吁亦既
可憫矣而孫生不特自為養也又將推此以教其類則
不亦重可愧乎吾鄙之士苟相與扶持之尚見古相師
之意云

書龍協惠事

余自潼川造朝龍協惠以筆史從既遣還復思其人從
范殿撰借使久之未至余以臯去意不復我從矣抵于

湖協惠闖然來逆余且請為范公進所撰地志即馳還
靖余為言窮馭絕裔安以筆史為其歸服爾事保爾祿
養爾親畜爾孥乃爾久計則口呿目瞪若弗愜志即而
問之對曰昔也朝廷法從人所爭趨豈欠一賤隸故猶
豫弗敢前今日渠陽逐客則前之爭趨者去之此正小
人願效奔走之時已白吾父四方上下惟主所命余嘆
嘉之聽其竣事而自至亡何踰嶺蹈谷跋曳以趨於靖
敝衣糲食承事朝夕視異時事余於潼不懈益虔會副

使闕彼當次補請於今侯不願速遷且俾後來者居己
上夫即新而棄故趨利而辟害者進而恥退樂囂而惡
閒往往士大夫有不免而一郡史能守之不渝此豈亡
見而然哉協惠方守其說而余懼其以是取憎於俗也
遣之使歸而識其事於冊云

贈術士游大有


五谿天下窮處靖居五谿之窮而逐客又其窮者盱江
游大有挾術而來言纚纚可聽乃請一言以探窮嗚呼

其果有見耶抑其窮未有愈耶余雅愛顧愷之語人稟
命有定分非知力所移惟應共已守道信天任運而闇
者不達妄意徼幸徒虧雅道無關得喪或有問於游生
者試以是告之安知無以為然而濟其窮乎

送左輦歸廬陵

臨邛魏某讀易至艮會廬陵左行之東歸書以贈之易
中光明多為艮發蓋人心遷於物則蔽闇止其所則光
明是以大象之文曰君子以思不出其位曰所曰位人

心之本體所以官天地而命萬物也止非其所思出其位則志為氣役物欲外遷而光明內蝕矣嗚呼行之尚敬之哉



鶴山集卷九十二

欽定四庫全書

集部
鶴山集卷九十三

詳校官庶吉士臣張溥

主事臣呂雲棟覆勘

總校官檢討臣何思鈞

校對官中書臣宋枋遠

謄錄監生臣陳槎

欽定四庫全書

鶴山集卷九十三

宋

魏了翁

撰

策

武學兵機策一道

世率謂漢初軍制徇秦凡命將出師率多踈畧不若中葉之後選用之詳然嘗取其一代制度而參考之則有不然者高帝知人善任量才授職誅秦慶項所向摧拉者其將非特英盧韓彭等輩也主閑廐也而名廐將主

輜重也而名重將將如林之師而名林將將築城之兵而名城將弩則有弩將射則有樓煩將騎則有郎騎將以至謹畏則謂之謹將勇特則謂之特將隨才而任之使得各盡其用焉不特此也並兩騎為軍翼而謂之駢鄰衛軍行之止舍而謂之稅衛掌軍門則有門尉掌旗幟則有幟志掌蔽遮則有寨路執矛執盾各有其職車司馬騎司馬之各効其用長隊將二隊將三隊將之各因其才而游擊將軍以游擊為事長鉦都尉以長鉦為

職蓋雖一技一能未嘗不兼收並錄也此等名號隨時
建置而初無定制邪或秦楚間固有是名也然皆見之
於楚漢未決之時而海內既定如前所謂諸將之號乃
不多見何邪當時如木罌擊豹囊沙誑龍與夫睢敗泚
勝漢亦屢陣於水矣而獨無掌舟楫之將何邪魏趙齊
楚折北相繼而此等諸將乃未嘗有顯然可見之功以
垂史冊何邪豈又量才授職職有所拘而不得逞邪或
貴乎擇人而不必徒泥乎名或所重者在主將而其餘

皆無益於成敗也反覆漢初任將之制而有疑焉試與諸君商訂之

策問一道

問古今治亂得失之變未嘗不自下情之通塞始工箴
瞽詩道謗市議此風降三代而無聞焉不謂漢而僅存
遺意也自高帝十二年立吳王始詔諸侯王議而議之
見於史者始此自後劉呂並王之議昭靈尊號之議稍
稍見於史然不過及於二三大臣而止也文帝至代邸

丞相上言與列侯宗室大臣吏二千石議其議幾若廣
於前矣而即位未幾收帑之議止於平勃肉刑之議止
於蒼敬列侯九卿而下胡為而不得以預諮訪之末邪
然賈誼為博士每詔令議下先諸老先生而為之對而
後元之詔亦曰令吏二千石博士議則是比六百石亦
得以預議焉又若初無定制何邪逮武昭宣元而後築
朔方之議及於中大夫挾弓矢之議及於光祿大夫侯
史高之議及於博士罷郡國廟之議見於議郎議出於

小臣而可行則罷珠厓之議違二府而從待詔賈捐之
呼韓邪保塞之議違有司而從郎中侯應虜使欲降之
議違公卿而從光祿大夫谷永朱博得罪不以將軍二
千石而廢諫大夫勝等之議王嘉得罪不以驃騎將軍
御史而棄少府猛等之議初不嫌於以卑抗尊也議出
於大臣而可行則入粟屯田之議皆大臣辯論而不決
者魏相一言而罷行如響初不嫌於以尊而抑卑也不
苟同不挾和不順指而天子臨決可否亦未嘗以大小

為嫌幾若有公天下之意較之高文諸君議不及於小
臣似若有廣狹之不侔何邪然言路浸廣而治日益降
豈其徒為具文而未必若高文之誠於聽納邪抑大臣
失權而在廷競進之士更相論難其議未必出於公邪
反覆一代之制而有惑焉試與諸君共商之

類省別試所策問第一道

問是是非非人之良心也不以職分之分合而有異同
不以時論之向背而為語嘿古先帝王欽承后帝顧享

率顧羣獻布列有位越小大謀猷固有攸伏將以使人
罔不自盡昭事厥辟暨我國朝列聖相承屈已稽衆尤
足以盡羣下之情不特分建三省以欽謹出令也中書
密院分職授任各班奏事事有大者始得同進故有中
書進擬有密院進擬有三省進擬有三省密院同進擬
其別蓋如此趙明與西人戰郭達修堡柵二府不嫌於
異議唐淑問除左司諫陸佃等罷侍講而侍御史謂非
西府所當同進副樞欲取中書斷案而傅堯俞持之李

清臣為吏部尚書而王巖叟辯之宰相欲用韓鎮鎮北
門而韓忠彥爭之自今觀之二府同列未始不相親也
至於國事則公爾忘私凜不可奪抑不知是非大明亦
有傷於同寅協恭之義否乎不特經由外省許其封駁
也關移臺諫先事究圖設有奏陳曾無嫌慮故臺臣論
陳執中而諫官不以為然諫官論蔡確而臺臣以不言
罷去至於王汾為諫議李常為中司楊畏為察官臺諫
亦互有抨擊自今觀之臺諫同列宜無所矛盾也而於

先朝舊制不相往來雖以長官亦無闕白遇有當言空臆無隱抑不知善惡大明亦有揚己取名之嫌否乎然猶以為未也侍從之臣職親地近論思獻納惟既厥心蓋不惟轉對可以盡言也或不時宣詔以備顧問不惟經筵可以進對也國家有大議如濮園新法河防邊奏從臣皆得以昌言之熙寧詔書謂言善而不用朕有厥咎道之而弗言爾為不恭所以望於從臣者若此司馬光辭副樞亦曰臣未受恩命猶是侍從之臣於朝廷闕

失無不可言者然則副樞雖尊返不若從臣之無不可
言乎自今觀之所謂從臣分曹列局各有攸司謂於朝
廷闕失無不可言抑不知論建太廣亦有越職言事之
嫌否乎竊又有疑言祖宗盛時二府合之時少而分之
日多以分者為是邪如韓縝以中書獨進擬而私姻戚
曾布以宥府獨奏事而擠宰臣則分者得為是乎以合
者為是邪如元祐回河之役二府之議適同而迄於貽
患則合者得為是乎惟臺諫亦然以異者為是邪始元

祐四年以諫官之請而盡罷丞雜以下則得毋太甚以同者為是耶如元祐初雖臺諫各與長官同對而當時已不謂然矣惟侍從亦然以有言者為是邪有如秦襄奎絳以議論不阿悉從外補則若將不可以有言矣以不言者為是邪有如范純仁所謂侍從之臣優游養望退有後言則若又將有瘵官之譏矣嘗三復舊典於其分合而觀士氣之屈信因其同異而察治道之進否蓋有感於中而不能嘿者詩曰不懈于位民之攸暨惓惓

之誠願與諸君切磋究之

又一道

善為天下者敵之強不足畏敵之弱不敢忽顧吾所以自治之道何如耳獫狁孔熾我是用急此以弱敵強也而侯誰在矣張仲孝友則敵雖強而不足畏蠢爾蠻荆大邦為讎此以強禦弱也而方叔元老克壯其猶則敵雖弱而不敢忽故凡忽弱而畏強者皆事外忘內者之為也嘗攷諸北國之始蓋自山戎獫狁至於冒頓而其

地始大東抵朝鮮南距長城西接烏孫北窮瀚海匈奴
既弱鮮卑嗣興蠕蠕浸衰突厥踵盛回紇僅破契丹崛
起女真垂弱韃靼驟強雖其種族不一興替無常而迭
相更代長為北邊之患其間惟秦皇漢武長驅深入漢
和唐太亦事窮征而卒莫能殄其遺育豈天地間固不
可有陽而無陰邪契丹之始至不足道也自入後魏其
名始見於中國爰暨五年稍僭位號間擾疆場太宗既
平河東聲勢響撼取幽薊如振槁耳然亦不過旋師於

幽迨其主少國危而復伐之乃以名將銳卒血於歧溝
此何為者哉敵席新勝之餘虔劉我邊垂蕩搖我鎮定
至於咸平景德以來勢益猖獗而乘輿既駕彼折北不
支委命下吏求成而退夫太平雍熙以我全盛之力而
不能乘彼衰弱之機咸平景德以我晏安之久乃能抗
彼方張之勢豈勝負果不可以人力計邪蕭英劉六符
之來既厭所欲蕭禧再至又決棄地之議故治平熙寧
以後敵勢益驕我師西征未皇北顧元祐以來復主和

親遷延至政宣以後則遠已為女真所殘不能國矣二
虎交斃我疑若可以分功者是以有燕雲之師以一時
宿將悉關陝驕銳之兵當契丹垂亡之餘而不能勝乃
返以夾攻背約重女真之忿其故何耶契丹既亡女真
孔熾航江桴海迫我未已敵之強蓋若此而士氣國威
反振於昔西有和尚原殺金坪之勝南有大儀李家灣
之勝有順昌柘臯之勝數年之間彼救死扶傷不暇至
於金亮之暴而采石瓜洲之勝卒使自斃以強弱之勢

論之其相反乃若此豈吾所謂善為天下者敵之弱不敢忽敵之強不足畏惟內脩政事外固封守將無不可為之時邪自昔為國鳴張虎視未有久而不衰者其范曄所謂叛服去來固自有數者邪抑亦不可委諸數而怠其事也諸君自此仕矣其素講預定以需世用

家塾試策問一道

問闕今試士於有司其有先於疆事乎外國相攻中國之福昔人有是言矣其於今也福乎禍乎或曰建炎以

來百年之一時不可失也或曰紹興以來屢和之成效固可恃也或曰開禧以來輕舉之當鑒不可再也或曰按甲毋動緩幣毋遣以委之於事勢之所趨而沽名以守斯可矣或曰殘寇垂亡新冠角立決非可和之時或曰縱彼未亡而以和歛我亦有宣靖以來之事可鑒或曰寓戰於守也或曰歛敵以和也或曰姑安之以待羣寇之自相吞噬也是數說者惡乎長朝廷分道置帥使一切假以遂事之權則萬一付予非人寧無誤事必從

中覆亦有不及事之憂若使節制司總領所得以分其
權則又不無掣肘之慮今當以何道處之王旅壞於刻
剝禁旅墮於不素教民兵阻於有功而不見知士馬物
故而不補則不給於用補之則力有不贍忠義人有志
於事功而不用則反而讎我用之則費無所出今當以
何策救之將之粗可用者或多驕恣而妄庸之夫或習
為誕謾沉勇之偏裨或見抑於猜忌輕俊之諸校或志
在於貪功今當以何術御之青徐雍豫密接吾境殘寇

之虛實諸寇之盛衰此可立知也邊臣以諜報來上亦皆可信乎朝廷以餉兵之計盡付之四總領予之以諸郡之財賦而益之以鹽酒山澤之利十年生聚為不少矣脫有風塵之警則科調譁然是亦可常乎中原倣擾後之望未遂而歎塞之衆浸多受之則貽後憂拒之則失人心聽其自去自來則卒為我患其間流徙之民或曰計口授田予以牛種或曰散處諸郡給以衣食不惟游手末作有不願耕之人又慮無以贍其後將驅之

出境與恐非所以慰遺黎之望山東西河南北之間固
多豪傑隱淪屠販今豈無人招而徠之徒啓誕妄寘之
邊郡又恐不靖將聽其銷磨與恐非所以收豪傑之心
和糴勸糴私糴何者可從兵運募運馱運其計安出截
留合撥綱運以給用度或恐乏公上之供億理已蠲窠
名以救目前或恐缺齊民之望是亦所當精講者也而
皆未有一定之論諸君為我一一言之毋徒陳已然之
病而不及治療之方

家塾再試策問一道

國朝之兵自太祖初定海內不過十有二萬至太宗以後日增月益極於章聖而西有靈夏之患北有契丹之難然且不過五十餘萬且所用皆正兵至康定慶厯而後正兵增至百萬乃又有河北河東忠義陝西保捷河北弓箭社畿內及諸路保甲河東陝西強壯是正軍之外創募民兵乃給於用何承平無事之日反不若經始多故之日邪非素拊循士大夫也而驅之鋒鏑之下果

皆可用乎南渡以來速於弭變自三衙禁旅御前諸軍
及州縣兵之外民兵之日益繁有荆鄂義勇有洋漢等
四郡義士有淮南萬弩手有御前萬弩營有沿邊土丁
有施黔勇敢義兵有福建槍杖手有諸路忠義社此皆
民自為守而不以靡廩粟者此外又有因其來歸而資
為鄉導生長邊方而願為我用者率謂之忠義人自紹
興以來頗亦賴其用然御失其道則憑怙其衆以敵我
師然則尚得謂之忠義乎將帥既不能孰何聽其所如

則往往生事於境外稍加過截則諄曰我捐軀以徇國
仗義以復讎也而胡為我沮至反戈以疾視則其勢不
得不厚資以招集也然苟得所欲則幡然而去願為我
用則仰給縣官民力既屈豈能勝此橫費將於何而給
之邪此其為勢決不能久來者必圖所以更張之也萬
一襲是跡而動殃禍之變寧有已耶韓忠獻公以義勇
刺正兵劉忠肅公亦欲以保甲優等人刺正兵二公自
謂得因變制宜之道矣而司馬公論義勇之害直謂教

之挽射擊刺乃他日為盜之資蘇文定論保甲之害亦謂一年不罷則廣勝之事可立而待然則今日以忠義分隸正兵其果可恃以為安乎反覆其事渺未有稅駕之期也諸君其為我籌之

家塾策問一道

自翠華南狩輿地之登於職方者東薄明粵南至瓊崖西盡岷嶓北極淮漢蓋僅當舜十二州之三漢十二部之四晉十九州之七為國若此亦廩廩矣而說者曰讎

恥所當雪也分義所當明也然而以強弱利害言則動必有悔其信然乎陸有重關水有長江自江以北又為淮若漢皆天所以限南北也今釋是不守而與羣寇角逐於兩河之間則勝負未可知古今論事亦專以地利言乎比年以來敵嘗越我濠梁踐我江北窺我漢南又嘗奪我西和成鳳梁洋大安之險矣尚地利之足恃乎九十年間生聚教訓亦豈不蒙和親之利今使幣之不通久矣脫又繼好寧不示弱於他寇取輕於殘敵乎於

其垂亡而猶與之和果可以紓目前之急乎無已則有
戰耳出淮蔡可以晚陳出海道可以擣青齊出襄陝可
以襲許出汝可以通洛出嵩虢可以震河東出商於秦
鳳可以圖陝西此雖武夫小人亦能按圖言之然中興
以來固嘗得河南而復失矣得陝西十三州而旋棄之
矣舉唐鄧海泗而授人矣自淮入泗自泗入宿紹興開
禧凡再至而再劬矣休兵息民之久取之而不能得得
之而不能守而謂今可為乎沿邊之民習見其爾今復

我信乎或曰資山東忠義可以平取青徐結約夏人可
以夾攻闕陝撫納宕昌十八蕃族可以援西和階文然
非我族類亦可保信乎我未有以致人之服從而赤手
空拳以御狙詐得乎譬彼舟流莫知所屆願與諸君切
磋商之

宗子取應策問一道

宗子取應之制務從寬易凡以厚同姓厚親親也雖然
酌以古制竊有感焉古之教者必由小學自幼儀簡諒

方甲書名禮樂射御具有次第蓋將陶鎔氣質涵養性
端以為知類格物之基非以勞之也經傳所載小學大
學之年雖互有不同然大要自成人以至強仕自有二
十餘年講學之功今教養之序淺而祿仕之意多毋乃
強之以學問乎取之以科舉之文自其童習固已勸趨
利祿寧不為德性之害乎或曰所謂強仕者疑以用之
鄉人及異姓也不然何其無別乎然古者王子羣后之
太子與鄉人偕齒於學自造士以上官爵位祿未嘗有

貴賤戚疏之別也今自行都以及郡國皆有學校科舉而王族之子弟曾不得與寒畯齒將以厚之也毋乃祇以為薄乎中興以來冠進士擢詞學舉童子者往往出於宗英寧可謂無人乎或又曰前所疑皆商制也周之宗盟其若是乎周制大抵仍商而升用之次又加嚴焉諸子攷其德行道藝而進退之蓋有已入太學而復退之者宿衛者號故士其新升試士未得正爵者號新士蓋有已升諸司馬而未遽爵者貴游子弟杜子春謂雖

貴猶學蓋有已貴而猶在學者三等采地王子母弟之
邑也而鄭氏釋中庸乃曰尊重其祿所以貴之而不授
官守然則又有已祿而不授以官守者今務從寬易以
廣宗英視商周孰為然邪諸君其深惟古義參酌今制
相與切磋究之

鶴山集卷九十三

欽定四庫全書

鶴山集卷九十四

宋 魏了翁 撰

長短句

和孫蒲江

闕

上元詞

又見王正班五瑞霽月光風恰與元宵際橫玉一聲天
似水陽春到處皆生意 十載奔馳今我里昔元非未
信今皆是風月惺惺人自醉却將醉眼看榮悴

虞永康

剛簡

所築美功堂於城南以端午落成

唐涪州賦水調歌即席次韻

江水自石紐灌口怒騰輝便如黑水北出迤邐到三危
百尺長虹天矯兩岸蒼龍偃蹇翠碧互因依古樹百尺
長脩竹萬竿旗畫堂開風與月巧相隨使君領客行
樂旌轟立披披慨想二江遺蹟更起三閭忠憤此日最
為宜推本美功意禹甸六章詩

張茶馬

闕

生日

六月十八日

輕露淪殘暑蟾影插高寒團團只似前夕持向老萊看

九袞元開艾算六甲更逢兕換梧竹擁檀欒都把方寸
地散作萬雲烟 錦邊城雲間戍雪山中山風流老監在
此憂顧賴渠寬天上玉顏含笑堂上酡顏如酒家國兩
平安又恐玉川子茗椀送飛翰

楊崇慶 蘇生 生日

風露浸秋色烟雨媚湖弦旌旗十里小隊擬約黥壇僊
身在黃旗朱邱名在玉皇香案底事箇人傳正恐未免
耳驚攪日高眠 虎分符龍握節鹿銜幡於君本亦餘

事所樂不存焉一點春風和氣無限藍田種子渺渺玉
生烟富貴誰不有借問此何緣

趙運判 師爲生日

萬里蜀山險難似上青天誰知得有人心之險甚山川
賴得皇華星使滿載春風和氣來自鑑湖邊要識方寸
地四十萬雲烟 佩瓏璫冠昱爚組蟬聯眼前富貴餘
事所樂不存焉聞道漢家子政博攷蘭臺載籍曾次着
千年會有太一老同結海山緣

廣漢士民送別用韓推官韻為謝

萬人遮道撥不斷爭挽房湖逐客臣罪既盈應九死全
荷君王矜惻况是當年曾將愚技十字街頭立恩波浩
蕩孤忠未報涓滴 世事應若穿楊一弦不到前發皆
虛的自判此生元有分不管筮違龜食靴帽叢中漁樵
席上無入非吾得倚湖一笑夜深羣動皆息

杜安人生日

九十秋光三十八新居初度稱觴青衫綵服列郎娘孫

枝無處著猶欠兩東林 盡是當年親手種如今滿院
芬芳只憑方寸答蒼蒼箇中無盡藏誰弱又誰彊

送嘉甫弟赴眉山

細雨斜風驅曉瘴綽開坦坦長途膏車秣馬問程初梅
梢迎候騎鴈影度平蕪 行已不論官小大窮探不間
精粗只從厚處作去聲規模簡編迂事業屋漏拙功夫

和閻廣安

闕

感皇恩韻

三峽打頭風吹回荆步坎止流行謾隨遇須臾風靜重

踏西來舊武世間憂喜地分明觀
喜事雖新憂端依舊徒為岷我且懽舞陰雲掩映天末扣閣無路一鞭歸去也鷗為侶

登白鶴山借前韻呈同遊諸丈

關風長雨連宵昨朝晴色隨軒驟松聲花氣江烟浦樹
如相迎候山送青來僧隨麥去山為吾友更携筇直上
薜蘿深處雲垂幄蘚成甃未至相如獨後對山尊勸
壽多又記曾犯雪重來已是綠肥紅瘦好語時聞憂端

未歇倚風搔首謾持觴自慰冰山安在此山如舊

去冬來時

僧無恙也

次韻西叔兄詠蘭

玉質金相長自守閒庭閤室對黃昏月冷朦朧霧浥知
我者希常我貴於人不即而人即彼云云謾自怨靈均

傷蘭植

屈平子建憤世之不見知離騷常以蘭自況而子建亦謂秋蘭可喻桂樹冬榮

鷓鴣亂

春芳寂絡緯呌池英摘惟國香耐久素秋同德既向靜
中觀性分偏於發處知生色待到頭聲臭兩無時真聞

識

吳制置獵生日

世界要扶助人物載者英茫茫四海誰識今代有龐臣
萬頃青湖佳氣一片紫巖心事天付與斯人聳聳鐵冠
吏表表白雲卿海沮漳城漢郢宅峨岷規摹妙處曾
次納納幾滄瀛未說令公二紀先看武公百歲年與學
俱新星弁百僚準天宇四時春

和黃侍郎

疇若見貽生日韻

萬里載浮名憶昔從容下帝京
再再七年如昨夢分明
羸得存存夜氣清
誰使濫專城有罪當誅尚薄刑
細數當時同省士皆卿
落落韶陽獨九齡

張致政

闕

生日

冬至子之半玉筯罇微陽
壺中別有天地轉覺日增長
一樣金章紫服一樣朱顏綠髮
翁季儼相望翁是修何
行未已且方將玉生烟蘭競
秀綵成行翁無他智只
把一念答蒼蒼今日列城桃李
他日八荒雨露都是乃

翁莊要數義方訓不說竇家郎

楊子有德輔母夫人生日

尚憶去年稱壽日綵衣猶帶天香今年還見鴈成行兩
頭娘子拜笑領伯仁觴 知是幾年培植底如今滿院
芬芳只憑方寸答蒼蒼春風來不斷點綴艷陽粧

婦生朝李倅闕同其女載酒為壽用韻謝之

曾向君王說臣願守嘉州風流別乘初屆元在越王樓
湖上龜魚何事橋上鴈犀誰使爭挽海山舟便遣舊姻

姪邂逅作斯遊 晚風清初暑漲暮雲收公堂高會恍
疑僊女下羅浮好是中郎有女况是使君有婦同對藕
花洲擬把鶴山月換却鑑湖秋

張邛州 師夔生日

腰着萬釘犀玉帶肘垂斗大金章非關性分總尋常要
知真樂處綵服鬢毛蒼 浩蕩春風生玉樹蒸成滿院
芬芳斗城無處著韶光會歸天上去長捧伯仁觴

趙運判 師方生日 四月十一日

有斐碧巖使滿腹鑑湖秋不居上界官府來作散仙遊
長佩高冠人偉組練錦袍官貴清獻舊風流杓柄長多
少洗盡蜀民愁 鷓鴣冠貂尾案鷺鷥輶時來正恐不
免留滯劍南州簾捲西州風雨庭竚百城歌鼓桃李翠
雲稠誰謂蜀山遠只在殿山頭

張總領闕生日

家住我山趾暑風輕雙泉漱玉五坡攢翠坡上主人歸
無計夢泛滄波清泚曾拜奏前旒十二願上皇華將親

去及翁年未老相扶曳乘欸段過閭里 壘書未報人
相謂倚西風戰塵漲野隱憂如蝟就似東門賢父子祇
恐榮親猶未待洗盡岷峨憔悴便把手中長杓柄為八
荒更作無邊施却上表乞歸侍

管待李眉州勸酒

十載交盟可重尋賸於棠茇細論心雲遮晚日供秋思
風遞荷香作晚陰 紆勝引豁塵襟未須紫馬去駸駸
玻瓈無計留君住但乞天公三日霖

管待李參政壁勸酒

落日下平楚秋色到方塘人間袪暑難耐獨有此清涼
龍卷八荒霖雨鶴閱十州風露回薄水雲鄉欲識千里
潤記取玉流芳石蘭衣江蘺佩芰荷裳箇中自有服
媚何必錦名堂吸取玻璃清漲喚取逍遙舊夢人物儼
相望矯首望歸路三十六虛皇

管待楊伯昌

子謨
勸酒

獨立西風裏渺無塵銀河掛斗碧天如洗鵲樓前迎

風處吹墮乘槎星使弄札札機中巧思織就天孫雲錦
段尚輕陰未閣留纖翳親為挽天潢水 等閒富貴浮
雲似須存留幾分清論護持元氣曾把古今興亡事奏
向前旒十二雖去國言猶在耳念我獨兮誰與共謾凝
思一日如三歲夜耿耿不皇寐

李提刑冲佑壁生日

溥露侵秋色零雨濯湖弦做成特地風月管領老臞仙
鴈落村間杯影魚識橋邊拄杖慮淡境長偏祇恐未免

耳驚攪日高眠 龍握節貂插案鹿銜輻於公元只餘
事所樂不存焉手植藍田種子無數堦庭成樹鬱鬱紫
生烟富貴姑勿道借問此何緣

王總領闕

生日 八月六日

輕露瀟殘暑哉魄擬初弦天台萬八千丈中有紫霞仙
止理中樞舊武却憶鄰環昨夢重上蜀青天只守伯禽
法駟野萬雲烟 錦川星郎位宿又移躔為無結輩十
數踏遍蜀山川人識紹興奉使家有顯謨科約慧命得

公傳從此造朝去兩地一青氈

利路楊憲熹生日

歲歲為公壽著語不能新自公持節北去我亦有遐征
坐我碧瑤洞府被我石楠嘉蔭冰柱向人清待屈西風
指王事有期程我嘗聞由漢水達河津癡牛騃女會
處應有汎槎人便向漢川東畔直透銀河左界去上白
雲京袖有傳嬭研我欲丐餘芬

送張總領

知年來幾番拜疏但言歸去歸去問歸有底匆忙事得
恁陳情良苦天未許將花綬藻衣為插儀庭羽掉頭不
顧念白髮翁兒本來天分不是折腰具從頭數多少
漢庭簪組滔滔車馬成霧爭如祖帳東門外父子縹縹
高舉我眉下有幾許湖山無著春風處留君不住但遠
景樓前追陪杖屨莫忘却別時語

和趙黎州

闕

陪李參政

壁

遊醴泉西園

沙堤除道火成城換得午橋清寒色般添酒令野芳抵

當劔美 松馨花氣岸容山意浦思溪情誰記一時勝
引坐中喜得閒平

李參政壁生日 十一月二十四日

曾記武林日歲上德星堂相君襟度夷雅容我少年狂
輦路升平風月禁陌清時鐘鼓噓子雖反撮口也送紫霞觴回

首十年事邂逅袞衣鄉 古今夢元一轍謾千場紛紛
間較目睫誰解識方將霜落南山秋實風卷比鄰夜燎
世事正忽忙天意那可問只願善人昌

送袁黎州

補

曉色織蔥雲日澹綽開坦坦長途西寧太守問程初梅
梢迎候騎柳樹困平蕪九折卬峽渾可事不妨叱馭
先驅平平豈是策真無撫摩迂事業細密鈍功夫

安大使

丙生日

人物正寥濶有美萬夫望七年填拊方面帷幄自金湯
千尺玉龍銜詔六尺寶勒照路載績滿旂常富貴姑勿
道難得此芬芳嘗試看今古夢幾千場人情但較目

曉誰解識方將霜落南山秋實風卷比鄰夜燎世事正
忽忙海內知公者只願壽而臧

上元放燈約束妓筵燈火

慳見江鄉文物地輕豪爭逐春妍銀花斜鞞紫金鞭千
燈渾是淚一笑不論錢今歲遨頭窮相眼繁華不學
常年只餘底事索人憐詩書真氣味農扈老風烟

次韻史少弼致政賦李叅政壁西園海棠

日日春風滿範圍海棠又發去年枝月籠火樹更深後

露滴燕支曉起時
看不足醉為期
宵征寧問角巾歌
一春好處無多子
不分西園掇取歸

同日李提刑堅亦有詞因次韻

腳踏西郊紅世界
才知春意分明
不須更說錦官城
香來遊冶騎得得
為渠停
停到花眠人
且去酒杯苦欲
留行直須醉飲
到參橫
不因歌白雪
三日作狂醒

郡圃新開雲月湖
約客試小舫

攬掇花枝趨那天
氣一半春休未
分真休平湖新漲雅

綠初抽 等閒作箇扁舟便都把湖光捲收世事元來
都緣本有不在他求

餞黃侍郎

疇若勸酒

向江頭幾回凝望垂楊那畔舟纜艤江神似識東歸意
故放一篙春水卻總被三百里人家祖帳連天起且行
且止便為汝遲留三朝兩日如此只如此 還須看世
上憂端如蝟一枰白黑碁子肥邊瘦腹都閒事畢竟到
頭何似當此際要嘿識沉思一着惺惺地目前誰是料

當局諸公斂容縮手日夜待公至

楊提刑子謨生日

有斐碧晶使長珮奏琅球門前初暑才漲一室淡於秋
簾捲峨眉烟雨袖挾西川風露滿眼綠陰稠人物渺然
甚得似此風流 此何時公猶滯劍南州分明憂在目
睫只恁付悠悠未問人謀當否須信天生賢哲不只等
閒休努力崇明德巨浸要平舟

趙茶馬師芳生日

漢使來何許到如今天邊又是薰絃三度見說山深人
睡穩細雨自催茶戶向滴博雲間看取料得權竒空卻
後指浮雲萬里追風去跨燕越抹秦楚不妨且為斯
人駐正年來憂端未歇壯懷誰吐頃刻陰晴千萬態怎
解綢繆未雨算此事誰寬西顧待洗岷峨悽愴氣為八
荒更著深長慮問兩社輔明主

鮮于安撫

闕

勸酒

固陵江上暮雲急一夜打頭風雨唯送春江船上水笑

指故山歸去靴帽叢中漁樵席上總是安行處惟餘舊話
為公今日拈取 見說家近岷山翠雲平楚萬古青如
故要把平生三萬軸喚取山靈分付廬阜高高睢陽岳
麓會與岷為伍及時須做鬢邊應未遲暮

頃得手帖曾
及此故云

生日謝寄居見任官載酒

三十七歲

怕年來年去漸雅志易華顛嘆夢裏青藜問邊銀信望
外朱轡十年竟成何事雖萬鍾於我曷加焉海上潮生
潮落山頭雲去雲還 人生天地兩儀間只住百來年

今三紀虛過七旬強半四帙看看當時只憂未見恐如
今見得又徒然夜靜花間明露曉涼竹外晴烟

張總領

闕

生日

六月十八日

有美人兮招不至幾回凝佇應只為家山自好不堪他
顧忙裏抽頭真得計閒中袖手看成趣念從前出處總
無心天分付雲冉冉更吞吐泉活活無朝暮與自家
意思一般容與月壑曉寒垂葉露風窓午睡連山雨看
蒼顏白髮兩間人摩今古

和李提刑堅見貽生日韻

宇宙中間還獨笑，誰疎誰密正從容。
行處山停川溢，鍾鼎勒銘模物象。
山林賜路開行，葦要不如曾次，祇熙熙無今昔。
便百中穿牙戟，怕六鑿生虛室。
為幽香小佇，旋供吟筆。人事未須勞預慮。
天公渾不消餘力。看雨餘雲捲，約簾旌明紅日。

送宇文侍郎

闕

知漢州勸酒

尚憶都門祖帳時，重來動是十年期。
雲拖暮雨留行色

露挾秋涼入酒卮 湖上鴈水邊犀未須矯首嘆來遲
北風滿地塵沙暗宣室方勞丙夜思

李提刑堅生日

秋意泠然對宇宙一尊相屬君看取都無凝滯天機純
熟水怕池塘鴻鴈聚露濃庭畹芝蘭馥笑何曾一事上
眉頭縈心曲興不淺船明玉人更健巾橫幅問人間
底處升沉遲速氣壓晴崑虹半吐眼明平楚雲相逐但
年年屈指問西風籟新綠

次韻李參政壁朝陽閣落成

月落星稀露氣香烟銷日出曉光涼天東扶木三千丈
一片丹心似許長湛以北洛之陽買花移竹且迷藏
九重閭闔開黃道未信低回兩鬢霜

李參政壁生日

湖水平漪與我意一般容與任多少雙鳧乘鴈落花飛
絮露冷雲寒烟外竹霜明日潔梅邊路怪天隨人意作
陰晴無非數方寸地圖書府老太史親分付況身名

四海未為不遇用舍行藏皆有命時來將相還須做且
閒中袖手閱時人摩今古

鄧倅

子美生日

許時閉戶閒踈散風月無人管自從陽律一番新又把
前回風月送西鄰浮雲富貴非公願只願公身健更
教剗活百來年此老終須不枉在人間

任隆慶之母正月十一日生隆慶十三日生日

無邊春色試從漢諭堂邊覓兒前上壽孫扶掖九十娘

娘身是五朝客 眼前富貴渾閒歷箇中真樂天然的

兒孫強勸持餘瀝娘道休休明日兒生日

堂名漢諭

燕甲戌進士歸自都城

古說士夫郡猶欠殿頭魁記曾分付公等行矣勉之哉
世事奕棋無定甲子循環復爾不免且低回人物價自
定萬事付銜杯 試與公同握手上春臺繁紅麗紫何
限轉首便塵埃欲識化工定處須向報秋時節未用較
先開休道屋猶矮脚相箇中來

張靜甫之母夫人生日

天為西南分八使更分四道蕃臣爭如齒宿綵衣新親
年開百歲又見子生孫 一度平反供一笑無邊桃李
皆春便歸天上極恩榮為君圖壽母去年曾以壽母圖為獻更看
太夫人

叔母生日

前數月西叔方以女妻唐迷之故未聯云云

遙想庭闈上壽時芝蘭玉樹儼成圍問娘鼎鼎修何行
一樣都生及第兒 春淡沲日熹微兩頭娘子玉東西

一杯更為諸孫壽子舍新來恰上楣

某既賦小闕為叔母壽因復惟念昔者未嘗不
得與稱觴之列今迎侍不果又以簡書不克
往侍缺然於懷再遣小闕託諸兄代勸

記得年年阿奴碌碌常在眼前綵舫吳天錦輪蜀地閱
盡山川今年苦戀家園便咫尺千山萬山但想稱觴
三荆樹下叢桂堂邊

次韻虞萬州

剛簡

以謁金門曲為叔母壽

那復有氣味醲於春酒猶向故鄉懷印綬相過何日又
吐出心腸錦繡問我阿娘依舊娘亦祝君如柏壽相
看霜雪後

即席和李參政璧白笑花清平樂

藍田玉種為我酬清供香壓冰肌猶怕重更倩留仙袂
捧看花美倩偏工舉花消息方濃此笑知誰領解無
言獨倚東風

鶴山集卷九十四